



DODIKOV TAJKUN AKCIJA SIPA-e PO NALOGU TUŽILAŠTVA BiH

Uhapšen vlasnik Pavlović banke

Tužilaštvo BiH vodi istragu u predmetu koji se odnosi na krivična djela finansijskog kriminala, vezana za poslovanje navedene banke i njenog vlasnika Slobodana Pavlovića

Pripadnici Državne agencije za istrage i zaštitu (SIPA) uhapsili su jučer po nalogu Tužilaštva BiH Slobodana Pavlovića (1938), vlasnika Pavlović Bank International. Prema saznanju BN TV-a Pavlović je uhapšen u 14 sati, između Stoca i Mostara. Prethodno je Pavlović oko 12 sati bio lociran u Trebinju, no kada je video SIPA-u krenuo je bježati. Zatim, u Bijeljini je uhapšen bivši direktor banke Petar Lazić (1962) i Ljiljana Garić (1964) koja je bila referent za obrade kredita u Pavlović banci.

Finansijski kriminal

Uhapšen je i Blago Blagojević (1950), nekadašnji bliski saradnik Slobodana Pavlovića. Priveden je zbog postojanja osnovna sumnje da je počinio krivično djelo zloupotreba položaja ili ovlaštenja i pranje novca, a sve u vezi sa poslovanjem Pavlović banke.

Oni su tokom jučerašnjeg dana privedeni u službene prostorije SIPA-e u Sarajevu, nakon čega će biti predani Tužilaštvu BiH na daljnje postupanje. Tužilaštvo BiH vodi istragu u predmetu koji se odnosi na krivična djela finansijskog kriminala, vezana za poslovanje navedene banke

i njenog vlasnika.

Inače, poslovanje Pavlovića se dovodi u vezu s brojnim aferama vezanim za pranje novca i malverzacije s kreditima.

Podsjećanja radi, Slobodan Pavlović je 7. decembra 2015. godine saslušan u Tužilaštvu BiH povodom kredita koji je u njegovoj banci podigao predsjednik RS-a Milorad Dodik, a nakon toga kupio vilu na Dedinju u Beogradu. Tada je Pavlović izjavio kako je u Tužilaštvu došao na vlastitu inicijativu. Nije želio komentarisati sporni kredit Milorada Dodika, kao ni informacije da su rate Dodikovog kredita uplaćivali radnici „Pavlović banke“, te da je Pavloviću, kao kontrauslugu, Dodik navodno omogućio kredit u „Investiciono-razvojnoj banci Republike Srpske“.

Milorad Dodik je 2007. godine, kada je bio predsjednik Vlade Republike Srpske, preko „Pavlović banke“ prebacio 750.000 eura za kupovinu vile na beogradskom Dedinju, ali se ispostavilo da je kredit u iznosu 750.000 eura podigao tek godinu nakon toga.

Slobodan Pavlović je rodom iz sela Popovi kod Bijeljine, a 1960-ih godina otišao je u Ameriku gdje je upoznao suprugu Miru i tamo se obogatio radeći sa nekretninama.

Smatra se jednim od najbogatijih Srba, a zovu ga i biznismen iz Čikaga. On se 1990-ih godina vratio u BiH, a jedan od njegovih prvih poduhvata u RS-u bila je izgradnja mosta preko Drine kako bi spojio RS i Republiku Srbiju. U blizini je sa nekoliko građevina nikao i njegov privatni grad „Slobomir grad“. Izgradio je i „spomenik srpskom junaku“, vojvodi Ivi od Semberije.

U toku agresije na BiH, Pavlović je angažovao dvojicu američkih advokata kako bi sa zvaničnicima RS-a izradili nacrt deklaracije nezavisnosti i ustav po uzoru na američki. On je njihov prijedlog iznio Radovanu Karadžiću, koji je pohvalio taj nacrt i izrazio žaljenje zato što ga Skupština nije prihvatila. Kasnije je Pavlović Karadžiću podigao spomenik.

Nakon što je osnovao Pavlović Internacional banku, otkupljuje tri banke iz RS-a. Zatim, 2001. godine kupuje Sembersku banku u Bijeljini za 1,5 miliona KM.

Žitopromet

Naredne godine kupuje Privrednu banku iz Doboja i Privrednu banku iz Brčkog za 1,2 miliona KM. Tužilaštvo RS-a je pokrenulo istragu u vezi sa okolnostima pod kojima je iz-


vršena prodaja dobojske banke, ali nije otkriveno ništa. Pavlović je također kupio udio u dvije prehrambene kompanije tokom 2004. godine. Radi se o Žitoprometu, prerađivaču žitarica iz Bijeljine, i Romanija Sprintu. E. DUVNJAK - ŠALAKA

DODIK NA ČELU GRUPE

Krivična prijava SDS-a

U novembru 2015. godine SDS je podnijela krivičnu prijavu protiv organizirane grupe, čiji je organizator Milorad Dodik, za zloupotrebu službenog položaja i ovlasti, davanja i primanja mita, te udruživanja radi činenja krivičnih djela i organiziranog kriminala. Tada je između ostalog krivična prijava podnesena i protiv Slobodana Pavlovića, Petra Lazovića...

-Mi smo tada u krivičnoj prijavi sve rekli, dokumentacijom koju smo predali. Ostalo je na nadležnim organima da urade svoj dio posla. Očekujemo epilog - kazala nam je jučer Jelena Dabarčić, glasnogovornica SDS-a.



Pavlović dao kredit Dodiku